

1270-1270- OFP - Acta Capitulum Generalium apud Mediolanum Celebrati

In nomine patris et filii et spiritus sancti. Amen.

Acta capituli generalis apud Mediolanum
celebrati anno Domini · M^o · CC^o · LXX^o ·

Confirmamus has constitutiones. In capitulo de officio ecclesie. ubi dicitur. surgant fratres dicendo officium de beata virgine. deleatur. dicendo. et dicatur sic. surgant fratres. et stando dicant officium de beata virgine. Et hec habet · iii · capitula.

Item hanc. In capitulo de electione magistri. ubi dicitur. in anno autem priorum provincialium duo de diffinitoribus immediate precedentis capituli provincialis. qui primitus habitum nostri ordinis susceperunt. addatur. qui tunc superstites fuerint. Et hec habet · iii · capitula.

Item hanc. In capitulo de capitulo generali. post illud. nisi magistro et diffinitoribus videatur. quod per · i · diem. vel duos ad plus debeat prolongari. addatur. necessitate vero urgente magister ordinis. cum assensu prioris provincialis. in cuius provincia generale capitulum fuerit celebrandum. de consilio discretorum. ad alium conventum eiusdem provincie capitulum transferre possit. Et hec habet · iii · capitula.

Item. In oracione. A cunctis. post illud. et beatis apostolis Petro et Paulo. addatur. atque beato Dominico. Et hec habet · iii · capitula.

Item. In rubrica misse. ubi agitur de pace danda. ubi dicitur. in dominicis diebus. addatur. et festis semiduplicibus. et supra. Et hec habet · iii · capitula.

Item. In eadem rubrica. ubi dicitur. illi vero qui pacem receperint. etc. deleatur totum. usque ibi in ceteris autem diebus nunquam pax detur. Et hec habet · iii · capitula.

Item. Infra ubi dicitur. si festum duplex. vel totum duplex in dominica evenerit. deleatur totum. et dicatur sic. in festis duplicibus. et totis duplicibus. etc. Et hec habet · iii · capitula.

Iste sunt approbaciones.

Approbamus hanc. In capitulo de electione prioris conventualis. ubi dicitur. fratres autem post duos annos. deleatur. duos annos. et dicatur. · iiiior · annos. Et hec habet · ii · capitula.

Item hanc. In capitulo de studentibus. post illud. ubi viget studium. addatur. extra suas provincias. de diffinitorum capituli provincialis. vel maioris partis eorum consilio et assensu. ubi aliquem missorum studencium infra · vi · menses a tempore celebrati capituli mori contigerit. vel alias impediri. Et hec habet · ii · capitula.

Item hanc. In capitulo de electione diffinitorum. ubi dicitur. cui socius competens a priore provinciali. et diffinitoribus assignetur. deleatur totum. et dicatur sic. cui socius post electionem diffinitoris ab eodem capitulo provinciali eligatur. et qui plures voces eciam citra medietatem eligencium habuerit; diffinitoris socius habeatur. Et hec habet · ii · capitula.

Item hanc. In capitulo de ieiuniis. ubi dicitur. nisi dies natalis domini ea die evenerit. usque ibi. vel nisi precipuum festum fuerit. deleatur totum. et dicatur sic. quadragesimali utimur cibo. nisi in dictis feriis · vi · tantum cum aliquo propter laborem dispensetur. vel in locis. in quibus in eisdem · vi · feriis aliter comederetur. vel eciam ubi precipuum festum fuerit. Et hec habet · ii · capitula.

Item hanc. In capitulo de visitatoribus. ubi dicitur. si qua autem gravia et periculosa invenerit. addatur. emersisse a tempore visitacionis ultimo facte per precedentem visitatorem. Et hec habet · ii · capitula.

Item. In ordinario in rubrica misse dominice in ramis palmarum. post illud. nec signent se fratres. addatur. cum ille. qui legit passionem. pronunciat. emisit spiritum sileat et totus chorus prosternat se super formas. devote gracias [agens] redemptori. donec facto signo a prelato. surgat chorus. et lector prosequatur passionem. Idem eciam fiat in aliis passionibus. ubi dicitur. expiravit. vel tradidit spiritum. Et hec habet · ii · capitula.

Item. In capitulo De itinerantibus. in fine addatur. si quis frater ordinis nostri. per se. vel per alium. ordinationem de se. vel de alio fratre factam. vel obedienciam sibi. vel alii fratri iniunctam. per quamcumque personam extra obedienciam nostri ordinis constitutam. quocumque modo procuraverit revocari. vel in aliqua provincia. seu conventu. aut in officio. sive eciam studio generali poni. vel remanere vel inde amoveri. vel cum personis extraneis commorari; ipso facto. ex vi presentis statuti. tam in vita. quam in morte suffragiis ordinis. et omni voce. tam in electionibus. quam in tractatibus eorum que ad capitula mittenda sunt. penitus sit privatus. nec ad predicta restitui valeat. nisi per magistrum ordinis; vel diffinitores capituli generalis. Et hec habet · ii · capitula.

Iste sunt inchoaciones.

Inchoamus hanc. In capitulo de electione prioris provincialis. ubi dicitur. mortuo priore provinciali vel amoto. qui locum eius tenet. teneatur convocare quam cicius poterit electores. etc. deleatur totum. usque ibi. transferatur. et dicatur sic. mortuo priore provinciali vel amoto. qui eius locum optinet. teneatur convocare quam cicius poterit. electores. et in die ad eligendum assignata. prior provincialis eligatur vel

postuletur. et provinciale capitulum celebretur. nisi prius fuerit celebratum. quod si in die statuta. non eligerint. vel postulaverint; potestas providendi ad magistrum ordinis transferatur.

Item hanc. In eodem capitulo. in fine ubi dicitur. prior provincialis provinciam suam visitare curet. deleatur totum usque ad finem capituli. et dicatur sic. prior provincialis per se vel per alios qui tam super priores quam super fratres in conventibus et domibus ad visitandum sibi commissis. infra tempus a provinciali assignatum eisdem. ex ipsius commissione plenariam habeant potestatem. nisi provincialis ex causa sibi reservet aliqua. teneatur singulis annis totam suam provinciam visitare. et isti quibus vices suas committit; teneantur sequenti provinciali capitulo personaliter interesse.

Item hanc. In capitulo de electione prioris conventualis. ubi dicitur. si ei visum fuerit confirmetur. deleatur totum usque ibi. conventus autem qui petit. etc. et dicatur sic. idem eciam fiat. si aliquis a maiori parte illorum ad quos spectat electio. de alio conventu fuerit postulatus.

Item hanc. In eodem capitulo. infra ubi dicitur. si infra mensem non elegerint. addatur. vel postulaverint. Item hanc. In capitulo de electione prioris provincialis. ubi dicitur. vices eius optineat. addatur. quod si capitulum provinciale; ex aliqua causa. ad conventum alium transferatur. post translationem; prioris vicarii potestas expiret. et prior loci illius ad quem capitulum translatum fuerit; vices provincialis optineat.

Item hanc. In capitulo de gravi culpa. ubi dicitur. caveat autem quilibet frater. ne proclamet aliquem de crimine. nisi possit probare. deleatur totum et dicatur sic. caveat autem quilibet frater. ne proclamet aliquem. in capitulo de crimine eciam de auditu; nisi ipsum crimen possit probare.

Item hanc. In capitulo de studentibus. ubi dicitur · iiiior · autem provincie. etc. deleatur totum usque ibi. provideant. et dicatur sic · vi · autem provincie scilicet. Hispania. Provincia. Lombardia. Romana provincia. Theotonia. Anglia provideant. etc.

Item hanc. In capitulo de visitoribus. ubi dicitur. si aliquis visitor antequam visitet. addatur. vel in ipsa visitacione. et ubi dicitur. in priorem confirmatus fuerit vel mortuus. addatur. vel alias impeditus.

Item hanc. In capitulo de rasura. ubi dicitur. quarta inter purificationem et pascha. addatur. cum vero prolixitas temporis inter purificationem et pascha exegerit. addatur alia rasura. et tunc ille due intermedie fiant partito tempore.

Item. In eodem capitulo. ubi dicitur · xiiia · in festo beati Dyonisii. deleatur totum usque in finem. et dicatur sic. · xiiia · in festo sancti Michaelis. · xiva · in festo sancti Luche. · xva · in festo · iiiior · coronatorum. · xvia · in festo sancti Andree apostoli.

Iste sunt admoniciones.

Admonemus. quod supiores et alii priorum vicarii. vacante prioratu. non distrahant libros fratrum defunctorum; nec aliquas notabiles mutaciones faciant in conventu.

Item. Quod in oracione. a cunctis. et in postcommunionem quando ad nomen beate virginis fratres inclinant. inclinati persistent. quousque sit nomen beati Dominici nominatum.

Item. Volumus et districte iniungimus. quod quilibet prior conventualis. singulis annis. et specialiter in principio sui regiminis. a quolibet fratre diligenter inquirat. quid habeat. quid debeat. quid eciam debeatur ei. et in scriptis redigat. et cum postea scrutinium de rebus fratrum fecerit. si quid auctum. vel diminutum fuerit; inquirat de hoc sollicitate rationem. et faciat quod fratres qui pecuniam ad aliquos usus habent. illam expendant. et longo tempore non conservent. et pecuniam illam det conventui; si frater illam non expenderit infra tempus sibi ad hoc assignatum. Et hoc idem observent priores provinciales vel eorum vicarii circa priores conventuales; quando eos contigerit visitare conventus.

Item. Volumus et monemus. quod priores provinciales constitutionem de suis provinciis per se vel per alios visitandis. curent. singulis annis. diligencius observare.

Item. Inhibemus districte. ne frater aliquis scribat. vel scribi faciat. vel emat librum aliquem; causa lucrandi.

Item. Inhibemus. ne frater aliquis novicius. vel professus. pecuniam pro libris emendis. vel libros emptos. vel emendos ex ea; ad usum sui deputet. vel donet alicui conventui. sine prioris sui provincialis licencia speciali. quod si secus factum fuerit; totum sit irritum et inane.

Item. Priores provinciales non dent fratribus licenciam recipiendi pecuniam. nisi taxata quantitate. nec illi recipiant sine consciencia suorum priorum.

Item. Iniungimus tam prioribus. quam fratribus universis. ut ipsi diligenter assistant inquisitoribus; ad fidei negocium promovendum.

Item. Inhibemus districte. ne frater aliquis clericus. procurator vel alius. portet in persona propria pecuniam; extra domum.

Concedimus provincie Hispanie; · ii · domos. provincie Provincie; · i · provincie Lombardie; · i · provincie Romane; · ii · provincie Anglie; · ii · provincie Polonie; · i · Et iste domus ponantur ubi prior provincialis et diffinitoribus provincialis capituli visum fuerit. ita tamen quod ponantur sine preiudicio aliarum provinciarum.

Pro venerabili collegio cardinalium. et statu universalis ecclesie; quilibet sacerdos · iii · missas. etc.

Pro domino Iordane cardinali defuncto; quilibet sacerdos · i · missam¹.

Absolvimus priores; Astenensem (!). Laudensem. etc.

Committimus magistro ordinis ordinationem studii Parisiensis. et aliorum studiorum generalium · iiiior · provinciarum. ut de ipsis. in magistris et bacallariis. et aliis ad studium pertinentibus curam habeat diligentem.

Fratri Bartholomeo Turonensi². quia ordinationi magistri de consensu suo facte. et litteris suis preceptoris non obedivit. et quia in facto cuiusdam testamenti quedam fecit. unde est grave scandalum ordini subsecutum. et quia in facto illius testamenti. in excusacionem sue culpe magistrum ordinis inculpavit. sicut patuit nobis de predictis. per litteras dilectorum fratrum fratris Thome³. et fratris Roberti⁴. et fratris Latini⁵. et iterum per litteras fratris Michaelis prioris Insulensis. et fratris Lamberti Leodiensis. inquisitorum super hiis deputatorum. iniungimus ei · xii · dies in pane et aqua. et · vi · psalteria. et privamus eum sigillo predicatoris generalis. et quod voce in omnibus tractatibus ordinis sit privatus. et quod in ordine non possit esse prelatus. nisi in omnibus hiis cum eo. per generale capitulum fuerit dispensatum. absolvimus eciam eum a vicaria. quam ei commiserat magister super fratres. qui vadunt cum cruce signatis ultra mare.

Suppriori Cremonensi. quia non recepit diffinitorem ad conventum suum secundum ordinationem precedentis capituli generalis · iii · dies in pane et aqua iniungimus et · i · psalterium.

Assignamus sequens capitulum generale. apud montem Pessulanum. in provincia Provincie. et diffinitores veniant ita tempestive. quod sint ibi infra octavas ascensionis. Sentencias iudicum approbamus.

Item. Quoniam per assignacionem festi beati Eduardi ante festum sanctorum Fabiani et Sebastiani irritantur plures rubrice; ipsum transferimus. ut fiat · iii · ydus octobris. immediate ante festum Calixti pape. et omnes rubrice ad dictum festum spectantes transferantur ad diem predictam. In lectionario eciam tam de eo. quam de beato Antonio ordinis fratrum minorum. inserantur lectiones; compilate de eorum vita. in breviariis vero portatilibus de communi confessorum. fiant lectiones.

Actis additae sunt litterae magistri ordinis; cf. app. n. XX.

¹ Jordanus Piruntus de Comitibus, diac. ss. Cusmae et Dam. † 1269. cf. EUBEL l.c. pag. 8.

² De fr. Bartholomaeo Turon. cf. SSOP I, 248; MOPH 2 p. VI.

³ Scil. Thomae de Aquino.

⁴ Fr. Robertus (Rothba) nescio an idem sit atque Robertus ille Kilwardbius, cuius ECHARDUS (SSOP I, 374 sqq.) mentionem facit, cum aetates satis bene conveniant.

⁵ De. fr. Latino cf. SSOP I, 436 sqq.; EUBEL l.c.p.